

**MB Kedah ada kuasa penuh  
Utusan Online  
11 Mac, 2012  
Oleh HASHIM P. MAMAT**

PADANG RENGAS 10 Mac - Menteri Besar Kedah, Datuk Seri Azizan Abdul Razak mempunyai bidang kuasa pentadbiran negeri yang tidak boleh dipertikaikan oleh mana-mana pihak termasuk Jawatankuasa Pemandu Pas Pusat, tegas Menteri di Jabatan Perdana Menteri, Datuk Seri Mohamed Nazri Abdul Aziz.

Beliau berkata, sebagai ketua tertinggi dalam badan eksekutif negeri, Azizan berhak untuk menerima atau menolak sebarang cadangan atau keputusan daripada pihak lain.

"Apa yang diputuskan oleh Menteri Besar dan barisan Exconya itulah yang digunapakai dan keputusan daripada Jawatankuasa Pemandu Pas Pusat tidak boleh digunapakai.

"Sebenarnya arahan parti itu boleh berjalan (dilaksanakan) sekiranya ada kerjasama daripada Menteri Besar berkenaan dan kalau beliau tidak mahu mendengar, beliau berhak. Sememangnya apa yang dikatakan oleh Azizan adalah betul," katanya kepada pemberita selepas menyampaikan Bantuan Rakyat 1Malaysia (BR1M) bagi Parlimen Padang Rengas di Sekolah Menengah Kebangsaan (SMK) Tun Perak, di sini hari ini.

Semalam, Azizan memberi 'pukulan balas' kepada kelompok yang cuba melemahkan kepimpinannya apabila menegaskan beliau hanya berpegang kepada peraturan termaktub dalam Undang-Undang Tubuh Kerajaan Negeri Kedah untuk mengurus tadbir kerajaan negeri.

Bagaimanapun, katanya, beliau sentiasa terbuka untuk mendengar pandangan daripada mana-mana pihak termasuk Jawatankuasa Pemandu yang ditubuhkan Pas untuk memantau kerajaan negeri secara peribadi.

Mohamed Nazri yang sependapat dengan Azizan berkata, Jawatankuasa Pemandu Pas Pusat tidak mempunyai kuasa dalam pentadbiran negeri dan memerlukan kerjasama daripada Menteri Besar untuk melaksanakan sesuatu cadangan atau keputusan yang dibuat.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0311&pub=Utusan\\_Malaysia&sec=Politik&pg=po\\_02.htm](http://www.utusan.com.my/utusan/info.asp?y=2012&dt=0311&pub=Utusan_Malaysia&sec=Politik&pg=po_02.htm)